



Rabu, 16 Oktober 2023
Ogen: Yesaya 40:29-31



Ipelimbarui Tuhan Gegehku



Selamat ulang tahun Moria GBKP. 66 tahun umur Moria wari enda. Tuhu jadi sada keriahen man banta sabap seh wari enda ipake Tuhan denga Moria jadi temanNa ngelaken kekelengenNa man doni enda. Labo ban gegeh ras kengasupen tapi ban perkuah ateNa.

Ipelimbaruina gegehku, e min jadi pengakun kerina Moria belang-belang doni enda. Adi sungkuni kerina nge lit perbeben geluh si man alanken. Banci saja lit pinakit si la erkedungen i tengah jabu, enggo menam labuh lanai terturiken. Deba pergaulen anak jadi tangkelen erkiteken dadapna si la man dadapen. Deba perduiten jabu si la cukup nehi keperluan jabu, ras keperluan anak sekolah, seh dungenna banci turah perubaten. Lenga ka urusen perkade-kaden, teman meriah ras pelayanen gereja. Banci kataken segudang perbeben si man alanken.

Tapi bagi raja wali kabang, lalap ia reh ganjangna. Kiam ia tapi la ia ngelabuh, erdalan ia tapi la akapna latih. Lit nge badai si man alanken rajawali e, lit nge persoalenna tupung ia kabang. Tapi i tengah badai si lit reh ganjangna ia kabang, teridah ia teneng, ngasup ngelewati kerina perbeben. Biak rajawali e, optimis, erjuang ras tangkas tujunna. Bage me kegeluhen Moria subuk bas jabu, pelayanen Gereja ras Masyarakat. I bas persadanna ras Tuhan ngasup dengen megegeh ia ngalaken kerina perbeben. Moria nggejapken gegehna e me bas Tuhan nari rehna, janah lalap ipelimbarui. Gegeh Tuhan jadi gegehna si mereken ketenengen ngalaken badai kegeluhen. I bas ketenengen e Moria reh ngasupna kabang nehi tujun kegeluhenna.